


**LIBURUAK**

Izenburuak: 'Egipto' eta 'Mendebaldeko konkista'.

Testua eta marrazkiak: Hainbaten artean. **Itzulpena:** Manu Arregi eta J. M. Olaizola *Txiliku*, hurrenez hurren. **Orrialde**

kopurua: 32na orrialde, koloretan. **Argitaletxea:** Ttartalo.

**Itziar Irastorza**

TTARTALO ARGITALETXEKO ARGITARATZAILEA

«Bilduma berezia da, dagoeneko gure katalogoan erreferentia bihurtzen ari da»

Aspaldiko garaietan, zibilizazio ugari bizi izan ziren. Egíptokoa eta Ipar Amerikako Mendebaldean bizi ziren indiarrek dira haietako bi. Nork bere ohiturak, sinesmenak eta bizitzeko moduak zituzten. Garai haietara bidaiatzeko eta zibilizazio haiek ezagutzeko aukera ematen dute liburu horiek. Testu laburrez eta marrazki ikusgarri apainduak daude liburuak.

Aspaldiko garaietara bidaiatu egiteko aukera du irakurleak, ezta? Nora?

Egíptora eta Ipar Amerikara joango gara. Bi liburuak batek duela sei mila urte inguru Egípto nola sortu zen eta hiru mila urtez nolako bilakaera izan zuen azaltzen digu. Bigarren liburuan, berriaz, XIX. mendea-



ren hasieran Ipar Amerikako Mendebaldean bizi ziren indiarrek pairatu zuten konkistaren historia gogorraren berri jasoko dugu.

Aspaldiko zibilizazio edo giza taldeak gertutik ezagutzeko liburuak dira.

Bai, gertutxoei oso erakargarriak egingo zaizkien bi zibilizazio garrantzitsu aurkezten dira. Batetik, guztiz liluragarria den faraoien garaiko Egípto; munduko estaturik zaharrenetarikoa izateaz gain, oso zibilizazio aurreratua eta aberatsa izan zena. Bestetik, munduko giza talde miresgarrienetako bat, Ameriketako indiarrek; naturarekin eta haien sinesmenekin orekan bizi eta kultura eta tradizio oparoak zituena herri adoretua.

Zein informazio ematen da haiei buruz?

Informazio ugaria eta interesgarria ematen da: herri haien sorrera, lehenengo biztanleen etorrera, haien bizimodua, an-

tolaketa politikoa eta soziala, ohiturak, erlijioa eta sinesmenak, kultura, artea, eraikuntza, naturarekin duten harremana... Mendebaldearen konkistaren kasuan, Europatik joandako milaka lagunek indiarren lurraldeak indarrez bereganatu eta nola kolonizatu zituzten kontatzen da. Konkistak indiar herrian eragin zuen minaren eta kaltearen berri ematen digu liburuak.

Informazioa aurkezteko, askotariko elementuez baliatu da egilea.

Bilduma honen ezaugarri nagusienetako bat diseinua da. Oso diseinu zaindua dauka: ilustrazio originalak, orri hegaldun ikusgarriak eta informazioaren antolaketa txukuna. Akua-relaz egindako marrazkiak, museoetan gordetzen diren hainbat artelanen, tresnaren eta dokumentuen irudi eta argazkiekin uztartzen dira orrialdeak hornitzeko. Horrek guztiak testuak ulerterrazagoak egiten ditu, eta irakurketa, errazagoa eta atsegina.

Edozein ikastetxetan ikasmaterial gisa erabil daitezkeen liburuak dira, ezta?

Bai, Ezagutza Liburuak atalean kokatzen den materiala da, eta oso egokia izan daiteke eskolan lantzen diren zenbait gaitan sakontzeko eta haiei buruzko informazio gehigarria eskuratzeko. Bilduma honek, irakurketaz eta jakintzaz edonork gozatzeko moduko irakurgaiak proposatzeaz gain, eskolan zein etxean ikasleek egin beharreko lanak burutzeko material osagarria eskaintzen du.

Bilduma osatzen joateko asmorik ba al duzue?

Oraintxe bertan titulu pare bat aztertzen ari gara, eta litekeena da haiek argitara ematea datorren urtean. Bilduma berezia da, dagoeneko gure katalogoan erreferentia bihurtzen ari da, eta mereziko luke jarraipena ematea, zalantzarik gabe.